

হ য ব র ল

BANGLADARSHAN.COM
সুকুমার রায়

॥ হ য ব র ল ॥

বেজায় গরম। গাছতলায় দিব্যি ছায়ার মধ্যে চুপচাপ শুয়ে আছি, তবু ঘেমে অস্থির। ঘাসের উপর রুমালটা ছিল; ঘাম মুছবার জন্য যেই তুলতে গিয়েছি অমনি রুমালটা বলল, ‘ম্যাঁও!’ কি আপদ! রুমালটা ম্যাঁও করে কেন?

চেয়ে দেখি রুমাল তো আর রুমাল নেই, দিব্যি মোটা-সোটা লাল টকটকে একটা বেড়াল গৌফ ফুলিয়ে প্যাট প্যাট করে আমার দিকে তাকিয়ে আছে।

আমি বললাম, ‘কি মুশকিল! ছিল রুমাল, হয়ে গেল একটা বেড়াল।’

অমনি বেড়ালটা বলে উঠল, ‘মুশকিল আবার কি? ছিল একটা ডিম, হয়ে গেল দিব্যি একটা প্যাঁকপেঁকে হাঁস। এ তো হামেশাই হচ্ছে।’

আমি খানিক ভেবে বললাম, ‘তাহলে তোমায় এখন কি বলে ডাকব? তুমি তো সত্যিকারের বেড়াল নও, আসলে তুমি হচ্ছে রুমাল।’

বেড়াল বলল, ‘বেড়ালও বলতে পার, রুমালও বলতে পার, চন্দ্রবিন্দুও বলতে পার।’ আমি বললাম, ‘চন্দ্রবিন্দু কেন?’

শুনে বেড়ালটা ‘তাও জানো না? ব’লে এক চোখ বুজে ফ্যাচ্ ফ্যাচ্ করে বিশী রকম হাসতে লাগল। আমি ভারি অপ্রস্তুত হয়ে গেলাম। মনে হল, ঐ চন্দ্রবিন্দুর কথাটা নিশ্চয় আমার বোঝা উচিত ছিল। তাই খতমত খেয়ে তাড়াতাড়ি বলে ফেললাম, ‘ও হ্যাঁ হ্যাঁ, বুঝতে পেরেছি।’

বেড়ালটা খুশি হয়ে বলল, ‘হ্যাঁ, এ তো বোঝাই যাচ্ছে—চন্দ্রবিন্দুর চ, বেড়ালের তালব্য শ, রুমালের মা—চশমা। কেমন, হল তো?’

আমি কিছুই বুঝতে পারলাম না, কিন্তু পাছে বেড়ালটা আবার সেই রকম বিশী করে হেসে ওঠে, তাই সঙ্গে সঙ্গে হুঁ হুঁ করে গেলাম। তারপর বেড়ালটা খানিকক্ষণ আকাশের দিকে তাকিয়ে হঠাৎ বলে উঠল, ‘গরম লাগে তো তিব্বত গেলেই পার।’ আমি বললাম, ‘বলা ভারি সহজ, কিন্তু বললেই তো আর যাওয়া যায় না?’

বেড়াল বলল, ‘কেন? সে আর মুশকিল কি?’

আমি বললাম, ‘কি করে যেতে হয় তুমি জানো?’

বেড়াল এক গাল হেসে বলল, ‘তা আর জানিনে? কলকেতা, ডায়মণ্ডহারবার, রানাঘাট, তিব্বত-বাস! সিধে রাস্তা, সওয়া ঘণ্টার পথ, গেলেই হল।’

আমি বললাম, ‘তাহলে রাস্তাটা আমায় বাতলে দিতে পার?’

শুনে বেড়ালটা হঠাৎ কেমন গম্ভীর হয়ে গেল। তারপর মাথা নেড়ে বলল, ‘উহুঁ, সে আমার কর্ম নয়। আমার গেছোদাদা যদি থাকত, তাহলে সে ঠিক ঠিক বলতে পারত।’

আমি বললাম, ‘গেছোদাদা কে? তিনি থাকেন কোথায়?’

বেড়াল বলল, ‘গেছোদাদা আবার কোথায় থাকবে? গাছেই থাকে।’

আমি বললাম, ‘কোথায় তাঁর সঙ্গে দেখা হয়?’

বেড়াল খুব জোরে জোরে মাথা নেড়ে বলল, ‘সেটি হচ্ছে না, সে হবার যো নেই।’

আমি বললাম, ‘কি রকম?’

বেড়াল বলল, ‘সে কি রকম জানো? মনে কর, তুমি যখন যাবে উলুবেড়ে তাঁর সঙ্গে দেখা করতে, তখন তিনি থাকবেন মতিহারি। যদি মতিহারি যাও, তাহলে শনবে তিনি আছেন রামকিষ্টপুর। আবার সেখানে গেলে দেখবে তিনি গেলেন কাশিমবাজার। কিছুতেই দেখা হবার যো নেই।’

আমি বললাম, ‘তাহলে তোমরা কি করে দেখা কর?’

বেড়াল বলল, ‘সে অনেক হাঙামা। আগে হিসেব করে দেখতে হবে, দাদা কোথায় কোথায় নেই; তারপর হিসেব করে দেখতে হবে, দাদা কোথায় কোথায় থাকতে পারে; তারপর দেখতে হবে, দাদা এখন কোথায় আছে। তারপর দেখতে হবে, সেই হিসেব মতো যখন সেখানে গিয়ে পৌঁছবে, তখন দাদা কোথায় থাকবে। তারপর দেখতে হবে—’

আমি তাড়াতাড়ি বাধা দিয়ে বললাম, ‘সে কি রকম হিসেব?’

বেড়াল বলল, ‘সে ভারি শক্ত। দেখবে কি রকম?’ এই বলে সে একটা কাঠি দিয়ে ঘাসের উপর লম্বা আঁচড় কেটে বলল, ‘এই মনে কর গেছোদাদা।’ বলেই খানিকক্ষণ গম্ভীর হয়ে চুপ করে বসে রইল।

তারপর আবার ঠিক তেমনি একটা আঁচড় কেটে বলল, ‘এই মনে কর তুমি’, বলে ঘাড় বেঁকিয়ে চুপ করে রইল।

তারপর হঠাৎ আবার একটা আঁচড় কেটে বলল, ‘এই মনে কর চন্দ্রবিন্দু।’ এমনি করে খানিকক্ষণ কি ভাবে আর একটা করে লম্বা আঁচড় কাটে, আর বলে, ‘এই মনে কর তিব্বত’—‘এই মনে কর গেছোবৌদি রান্না করছে’—‘এই মনে কর গাছের গায়ে একটা ফুটো—’

এই রকম শুনতে শুনতে শেষটায় আমার কেমন রাগ ধরে গেল। আমি বললাম, ‘দূর ছাই! কি সব আবোল-তাবোল বকছে, একটুও ভালো লাগে না।’

বেড়াল বলল, ‘আচ্ছা তাহলে আর একটু সহজ করে বলছি। চোখ বোজ, আমি যা বলব, মনে মনে তার হিসেব কর।’ আমি চোখ বুজলাম।

চোখ বুজেই আছি, বুজেই আছি, বেড়ালের আর কোনো সাড়া-শব্দ নেই। হঠাৎ কেমন সন্দেহ হল, চোখ চেয়ে দেখি বেড়ালটা ল্যাজ খাড়া করে বাগানের বেড়া টপকিয়ে পালাচ্ছে আর ক্রমাগত ফ্যাচ্ ফ্যাচ্ করে হাসছে।

কি আর করি, গাছতলায় একটা পাথরের উপর বসে পড়লাম। বসতেই কে যেন ভাঙা ভাঙা মোটা গলায় বলে উঠল, ‘সাত দুগুণে কত হয়?’

আমি ভাবলাম, এ আবার কে রে? এদিক ওদিক তাকাছি, এমন সময় আবার সেই আওয়াজ হল, ‘কই জবাব দিচ্ছ না যে? সাত দুগুণে কত হয়? তখন উপর দিকে তাকিয়ে দেখি, একটা দাঁড়কাক শ্লেট পেনসিল দিয়ে কি যেন লিখছে, আর এক একবার ঘাড় বাঁকিয়ে আমার দিকে তাকাচ্ছে।

আমি বললাম, ‘সাত দুগুণে চোদ্দ।’

কাকটা অমনি দুলে দুলে মাথা নেড়ে বলল, ‘হয়নি, হয়নি, ফেল্।’

আমার ভয়ানক রাগ হল। বললাম, ‘নিশ্চয় হয়েছে। সাতকে সাত, সাত দুগুণে চোদ্দ, তিন সাত্তে একুশ।’

কাকটা কিছু জবাব দিল না, খালি পেনসিল মুখে দিয়ে খানিকক্ষণ কি যেন ভাবল।

তারপর বলল, ‘সাত দুগুণে চোদ্দর নামে চার, হাতে রইল পেনসিল।’

আমি বললাম, ‘তবে যে বলছিলে সাত দুগুণে চোদ্দ হয় না?’

এখন কেন?

কাক বলল, তুমি যখন বলেছিলে, তখনো পুরো চোদ্দ হয়নি। তখন ছিল, তেরো টাকা চোদ্দ আনা তিন পাই। আমি যদি ঠিক সময়ে বুঝে ধাঁ করে ১৪ লিখে না ফেলতাম, তাহলে এতক্ষণে হয়ে যেত চোদ্দ টাকা এক আনা নয় পাই।

আমি বললাম, ‘এমন আনাড়ি কথা তো কখনো শুনিনি। সাত দুগুণে যদি চোদ্দ হয়, তা সে সব সময়েই চোদ্দ। একঘণ্টা আগে হলেও যা, দশ দিন পরে হলেও তাই।’

কাকটা ভারি অবাক হয়ে বলল, ‘তোমাদের দেশে সময়ের দাম নেই বুঝি?’

আমি বললাম, ‘সময়ের দাম কি রকম?’

কাক বলল, ‘এখানে কদিন থাকতে, তাহলে বুঝতে। আমাদের বাজারে সময় এখন ভয়ানক মাগি, এতটুকু বাজে খরচ করার যো নেই। এইতো কদিন খেটেখুটে চুরিচামারি করে খানিকটা সময় জমিয়েছিলাম, তাও তোমার সঙ্গে তর্ক করতে অর্ধেক খরচ হয়ে গেল।’ বলে সে আবার হিসেব করতে লাগল। আমি অপ্রস্তুত হয়ে বসে রইলাম।

এমন সময়ে গাছের একটা ফোকর থেকে কি যেন একটা সুডুৎ করে পিছলিয়ে মাটিতে নামল। চেয়ে দেখি, দেড় হাত লম্বা এক বুড়ো, তার পা পর্যন্ত সবুজ রঙের দাড়ি, হাতে একটা হুকো তাতে কল্কে-টল্কে কিছু নেই, আর মাথা ভরা টাক। টাকের উপর খড়ি দিয়ে কে যেন কি সব লিখেছে।

বুড়ো এসেই খুব ব্যস্ত হয়ে হুকোতে দু-এক টান দিয়েই জিজ্ঞাসা করল, ‘কই, হিসেবটা হল?’

কাক খানিক এদিক ওদিক তাকিয়ে বলল, ‘এই হল বলে।’

বুড়ো বলল, ‘কি আশ্চর্য! উনিশদিন পার হয়ে গেল, এখনো হিসেবটা হয়ে উঠল না?’ কাক দু-চার মিনিট খুব গম্ভীর হয়ে পেনসিল চুষল, তারপর জিজ্ঞাসা করল, ‘কতদিন বললে?’

বুড়ো বলল, ‘উনিশ।’

কাক অমনি গলা উঁচিয়ে হুকো বলল, ‘লাগ্ লাগ্ লাগ্ কুড়ি।’

বুড়ো বলল, ‘একুশ।’ কাক বলল, ‘বাইশ।’ বুড়ো বলল, ‘তেইশ।’ কাক বলল, ‘সাদে তেইশ।’ ঠিক যেন নিলেম ডাকছে। ডাকতে ডাকতে কাকটা হঠাৎ আমার দিকে তাকিয়ে বলল, ‘তুমি ডাকছ না যে?’ আমি বললাম, ‘খামকা ডাকতে যাব কেন?’

বুড়ো এতক্ষণ আমায় দেখেনি, হঠাৎ আমার আওয়াজ শুনেই সে বন্বন্ব করে আট দশ পাক ঘুরে আমার দিকে ফিরে দাঁড়াল। তারপর হুকোটাকে দূরবীনের মতো করে চোখের সামনে ধরে অনেকক্ষণ আমার দিকে তাকিয়ে রইল। তারপর পকেট থেকে কয়েকখানা রঙিন কাচ বের করে তাই দিয়ে আমায় বার বার দেখতে লাগল।

তারপর কোথেকে একটা পুরানো দরজীর ফিতে এনে সে আমার মাপ নিতে শুরু করল, আর হাঁকতে লাগল, ‘খাড়াই ছাব্বিশ ইঞ্চি, হাতা ছাব্বিশ ইঞ্চি, আস্তিন ছাব্বিশ ইঞ্চি, ছাতি ছাব্বিশ ইঞ্চি, গলা ছাব্বিশ ইঞ্চি।’

আমি ভয়ানক আপত্তি করে বললাম, ‘এ হতেই পারে না। বুকের মাপও ছাব্বিশ ইঞ্চি, গলাও ছাব্বিশ ইঞ্চি? আমি কি শুওর?’

বুড়ো বলল, ‘বিশ্বাস না হয়, দেখ।’

দেখলাম ফিতের লেখা-টেখা সব উঠে গিয়েছে, খালি ২৬ লেখাটা একটু পড়া যাচ্ছে, তাই বুড়ো যা কিছু মাপে সবই ছাব্বিশ ইঞ্চি হয়ে যায়।

তারপর বুড়ো জিজ্ঞাসা করল, ‘ওজন কত?’

আমি বললাম, ‘জানি না।’

বুড়ো তার দুটো আঙুল দিয়ে আমায় একটুখানি টিপে টিপে বলল, ‘আড়াই সের।’ আমি বললাম, ‘সেকি, পটলার ওজনই তো একুশ সের, সে আমার চাইতে দেড় বছরের ছোট।’ কাকটা অমনি তাড়াতাড়ি বলে উঠল, ‘সে তোমাদের হিসেব অন্য রকম।’

বুড়ো বলল, ‘তাহলে লিখে নাও—ওজন আড়াই সের, বয়েস সাঁইত্রিশ।’

আমি বললাম, ‘দুঃ! আমার বয়েস হল আট বছর তিনমাস, বলে কিনা সাঁইত্রিশ।’

বুড়ো খানিকক্ষণ কি যেন ভেবে জিজ্ঞাসা করল, ‘বাড়তি না কমতি?’ আমি বললাম, ‘সে আবার কি?’ বুড়ো বলল, ‘বলি, বয়েসটা এখন বাড়ছে না কমছে?’ আমি বললাম, ‘বয়েস আবার কমবে কি?’ বুড়ো বলল, ‘তা নয় তো কেবলি বেড়ে চলবে নাকি? তাহলেই তো গেছি! কোনদিন দেখব বয়েস বাড়তে বাড়তে একেবারে ষাট সত্তর আশি পার হয়ে গেছে। শেষটায় বুড়ো হয়ে মরি আর কি!’ আমি বললাম, তা তো হবেই। আশি বছর বয়েস হলে মানুষ বুড়ো হবে না? বুড়ো বলল, ‘তোমার যেমন বুদ্ধি! আশি বছর বয়েস হবে কেন? চল্লিশ বছর হলেই আমরা বয়েস ঘুরিয়ে দিই। তখন আর একচল্লিশ বেয়াল্লিশ হয় না—উনচল্লিশ, আটত্রিশ, সাঁইত্রিশ করে বয়েস নামতে থাকে। এমনি করে যখন দশ পর্যন্ত নামে তখন আবার বয়েস বাড়তে দেওয়া হয়। আমার বয়েস তো কত উঠল নামল আবার উঠল, এখন আমার বয়েস হয়েছে তেরো।’ শুনে আমার ভয়ানক হাসি পেয়ে গেল।

কাক বলল, ‘তোমরা একটু আস্তে আস্তে কথা কও, আমার হিসেবটা চটপট সেরে নি।’

বুড়ো অমনি চট করে আমার পাশে এসে ঠ্যাং ঝুলিয়ে বসে ফিস্‌ফিস্‌ করে বলতে লাগল, ‘একটি চমৎকার গল্প বলব। দাঁড়াও একটু ভেবে নি।’ এই বলে তার হুকো দিয়ে টেকো মাথা চুলকাতে চুলকাতে চোখ বুজে ভাবতে লাগল। তারপর হঠাৎ বলে উঠল, ‘হ্যাঁ, মনে হয়েছে, শোনো—

‘তারপর এদিকে বড়মন্ত্রী তো রাজকন্যার গুলিসুতো খেয়ে ফেলেছে। কেউ কিছুর জানে না। ওদিকে রাক্ষসটা করেছে কি, ঘুমুতে ঘুমুতে হাঁউ-মাউ-কাঁউ, মানুষের গন্ধ পাঁউ বলে হুড়মুড় করে খাট থেকে পড়ে গিয়েছে। অমনি ঢাক ঢোল সানাই কাঁশি লোক লঙ্কর সেপাই পল্টন হৈ-হৈ মার্-মার্ কাট্-কাট্—এর মধ্যে হঠাৎ রাজা বলে উঠলেন, পক্ষীরাজ যদি হবে, তাহলে ন্যাজ নেই কেন? শুনে পাত্র মিত্র ডাক্তার মোক্তার আক্কেল মক্কেল সবাই বললে, ভালো কথা! ন্যাজ কি হল? কেউ তার জবাব দিতে পারে না, সব সুড়সুড় করে পালাতে লাগল।’

এমন সময় কাকটা আমার দিকে তাকিয়ে জিজ্ঞাসা করল, ‘বিজ্ঞাপন পেয়েছ? হ্যাণ্ডবিল?’

আমি বললাম, ‘কই না, কিসের বিজ্ঞাপন?’ বলতেই কাকটা একটা কাগজের বাঙিল থেকে একখানা ছাপানো কাগজ বের করে হাতে দিল, আমি পড়ে দেখলাম তাতে লেখা রয়েছে—

শ্রীশ্রীভূষণিকাগায় নমঃ

শ্রীকাকেশ্বর কুচুকুচে

৪১নং গেছোবাজার, কাগেয়াপাটি

আমরা হিসাবী ও বেহিসাবী, খুচরা ও পাইকারী, সকল প্রকার গণনার কার্য বৈজ্ঞানিক প্রক্রিয়ায় সম্পন্ন করিয়া থাকি। মূল্য এক ইঞ্চি। CHILDREN HALF PRICE অর্থাৎ শিশুদের অর্ধমূল্য। আপনার জুতার মাপ, গায়ের রং, কান কটকট করে কিনা, জীবিত কি মৃত, ইত্যাদি আবশ্যিকীয় বিবরণ পাঠাইলেই ফেরত ডাকে ক্যাটালগ পাঠাইয়া থাকি

সাবধান!

সাবধান!!

সাবধান!!!

আমরা সনাতন রায়সবংশীয় দাঁড়িকুলীন, অর্থাৎ দাঁড়কাক। আজকাল নানাশ্রেণীর পাতিকাক, হেড়েকাক, রামকাক প্রভৃতি কাকেরাও অর্থলোভে নানারূপ ব্যবসা চালাইতেছে। সাবধান! তাহাদের বিজ্ঞাপনের চটক দেখিয়া প্রতারণিত হইবেন না।

কাক বলল, ‘কেমন হয়েছে?’

আমি বললাম, ‘সবটাতো ভালো করে বোঝা গেল না।’

কাক গম্ভীর হয়ে বলল, ‘হ্যাঁ, ভারি শক্ত, সকলে বুঝতে পারে না। একবার এক খন্দের এয়েছিল তার ছিল টেকো মাথা—’

এই কথা বলতেই বুড়ো মাং-মাং করে তেড়ে উঠে বলল, ‘দেখ! ফের যদি টেকো মাথা টেকো মাথা বলবি তো হুকো দিয়ে এক বাড়ি মেরে তোর শ্লেট ফাটিয়ে দেব।’ কাক একটু খতমত খেয়ে কি যেন ভাবল, তারপর বলল, ‘টেকো নয়, টেপো মাথা, যে মাথা টিপে টিপে টোল খেয়ে গিয়েছে।’

বুড়ো তাতেও ঠাণ্ডা হল না, বসে বসে গজগজ করতে লাগল। তাই দেখে কাক বলল, ‘হিসেবটা দেখবে নাকি?’ বুড়ো একটু নরম হয়ে বলল, ‘হয়ে গেছে? কই দেখি।’ কাক অমনি ‘এই দেখ’ বলে তার শ্লেটখানা ঠকাস্ করে বুড়োর টাকের উপর ফেলে দিল। বুড়ো তৎক্ষণাৎ মাথায় হাত দিয়ে বসে পড়ল আর ছোটো ছেলেদের মতো ঠোঁট ফুলিয়ে ‘ও মা, ও পিসি, ও শিবুদা’ বলে হাত-পা ছুঁড়ে কাঁদতে লাগল।

কাকটা খানিকক্ষণ অবাক হয়ে তাকিয়ে বলল, ‘লাগল নাকি! ষাট ষাট।’ বুড়ো অমনি কান্না খামিয়ে বলল, ‘একষড়ি, বাষড়ি, চৌষড়ি’—কাক বলল, ‘পঁয়ষড়ি।’

আমি দেখলাম আবার বুঝি ডাকাডাকি শুরু হয়, তাই তাড়াতাড়ি বলে উঠলাম, ‘কই হিসেবটা তো দেখলে না?’

বুড়ো বলল, ‘হ্যাঁ হ্যাঁ, তাইতো! কি হিসেব হল পড় দেখি।’ আমি শ্লেটখানা তুলে দেখলাম খুদে খুদে অক্ষরে লেখা রয়েছে—‘ইয়াদি কির্দ অত্র কাকালতনামা লিখিতং শ্রীকাকেশ্বর কুচুকুচে কার্যধগগে। ইমারং খেসারং দলিল দস্তাবেজ। তস্য ওয়ারিশানগণ মালিক দখলিকার সত্ত্বে অত্র নায়েব সেরেস্তার দস্ত বদস্ত কায়েম মোকরবী পত্তনী পাট্টা অথবা কাওলা কবুলিয়ৎ। সত্যতায় কি বিনা সত্যতায় মুনসেফী আদালতে কিম্বা দায়রায় সোপর্দ আসামী ফরিয়াদী সাক্ষী সাবুদ গয়রহ মোকর্দমা দায়েব কিম্বা আপোস মকমল ডিক্রীজারী নিলাম ইস্তাহার ইত্যাদি সর্বপ্রকার কর্তব্য বিধায়—’

আমার পড়া শেষ না হতেই বুড়ো বলে উঠল, ‘এসব কি লিখেছ আবোল-তাবোল?’ কাক বলল, ‘ওসব লিখতে হয়। তা না হলে হিসেব টিকবে কেন? ঠিক চৌকসমতো কাজ করতে হলে গোড়ায় এসব বলে নিতে হয়।’ বুড়ো বলল, ‘তা বেশ করেছ, কিন্তু আসল হিসেবটা কি হল তা তো বললে না?’ কাক বলল, ‘হ্যাঁ, তাও তো বলা হয়েছে। ওহে, শেষ দিকটা পড় তো?’

আমি দেখলাম শেষের দিকে মোটা মোটা অক্ষরে লেখা রয়েছে—

সাত দুগুণে ১৪, বয়স ২৬ ইঞ্চি, জমা ২.৫ সের, খরচ ৩৭ বৎসর।

কাক বলল, ‘দেখেই বোঝা যাচ্ছে অঙ্কটা এল্-সি-এম্ও নয়, জি-সি-এম্ও নয়। সুতরাং হয় এটা ত্রৈরাশিকের অঙ্ক, না হয় ভগ্নাংশ। পরীক্ষা করে দেখলাম আড়াই সেরটা হচ্ছে ভগ্নাংশ। তাহলে বাকি তিনটে হল ত্রৈরাশিক। এখন আমার জানা দরকার, তোমরা ত্রৈরাশিক চাও, না ভগ্নাংশ চাও?’

বুড়ো বলল, ‘আচ্ছা দাঁড়াও, তাহলে একবার জিগগেস করে নি।’ এই বলে সে নিচু হয়ে গাছের গোড়ায় মুখ ঠেকিয়ে ডাকতে লাগল, ‘ওরে বুধো! বুধো রে!’

খানিক পরে মনে হল কে যেন গাছের ভিতর থেকে রেগে বলে উঠল, ‘কেন ডাকছিস?’ বুড়ো বলল, ‘কাক্কেশ্বর কি বলছে শোনা।’

আবার সেই রকম আওয়াজ হল, ‘কি বলছে?’ বুড়ো বলল, ‘বলছে, ত্রৈরাশিকে না ভগ্নাংশ?’ তেড়ে উত্তর হল, ‘কাকে বলছে ভগ্নাংশ? তোকে না আমাকে?’ বুড়ো বলল, ‘তা নয়। বলছে, হিসেবটা ভগ্নাংশ চাস, না ত্রৈরাশিক?’

একটুক্ষণ পরে জবাব শোনা গেল, ‘আচ্ছা, ত্রৈরাশিক দিতে বল।’

বুড়ো গস্তীরভাবে খানিকক্ষণ দাড়ি হাতড়াল, তারপর মাথা নেড়ে বলল, ‘বুধোটীর যেমন বুদ্ধি! ত্রৈরাশিক দিতে বলব কেন? ভগ্নাংশটা খারাপ হল কিসে? না হে কাক্কেশ্বর, তুমি ভগ্নাংশই দাও।’ কাক বলল, ‘তাহলে আড়াই সেরের গোটা সের দুটো বাদ দিলে রইল ভগ্নাংশ আধ সের, তোমার হিসেব হল আধ সের। আধ সের হিসেবের দাম পড়ে—খাঁটি হলে দু টাকা চোদ্দ আনা, আর জল মেশানো থাকলে ছয় পয়সা।’

বুড়ো বলল, ‘আমি যখন কাঁদছিলাম, তখন তিন ফোঁটা জল হিসেবের মধ্যে পড়েছিল। এই নাও তোমার শ্লেট, আর এই নাও পয়সা ছটা।’ পয়সা পেয়ে কাকের মহা ফুঁর্তি! সে ‘টাক্-ডুমাডুম্, টাক্-ডুমাডুম্’ বলে শ্লেট বাজিয়ে নাচতে লাগল।

বুড়ো অমনি আবার তেড়ে উঠল, ‘ফের টাক্ টাক্ বলছিস? দাঁড়া। ওরে বুধো, বুধো রে! শিগগির আয়। আবার টাক্ বলছে।’ বলতে-না-বলতেই গাছের ফোকর থেকে মস্ত একটা পোঁটলা মতন কি যেন ছড়মুড় করে মাটিতে গড়িয়ে পড়ল। চেয়ে দেখলাম, একটা বুড়ো লোক একটা প্রকাণ্ড বোঁচকার নিচে চাপা পড়ে ব্যস্ত হয়ে হাত-পা

ছুঁড়ছে। বুড়োটা দেখতে অবিকল এই হুকোওয়ালা বুড়োর মতো। হুকোওয়ালা কোথায় তাকে টেনে তুলবে, না সে নিজেই পৌন্টলার উপর চড়ে বসে, ‘ওঠ বলছি, শিগগির ওঠ’ ব’লে ধাঁই ধাঁই করে তাকে হুকো দিয়ে মারতে লাগল। কাক আমার দিকে চোখ মটকিয়ে বলল, ‘ব্যাপারটা বুঝতে পারছ না? উধোর বোঝা বুধোর ঘাড়ে। এর বোঝা ওর ঘাড়ে চাপিয়ে দিয়েছে, এখন ও আর বোঝা ছাড়তে চাইবে কেন? এই নিয়ে রোজ মারামারি হয়।’

এই কথা বলতে বলতেই চেয়ে দেখি, বুধো তার পৌন্টলা শুদ্ধ উঠে দাঁড়িয়েছে। দাঁড়িয়েই সে পৌন্টলা উঁচিয়ে দাঁত কড়মড় করে বলল, ‘তবে রে ইস্টুপিড উধো!’ উধোও আস্তিন গুটিয়ে হুকো বাগিয়ে হুংকার দিয়ে উঠল, ‘তবে রে লক্ষ্মীছাড়া বুধো!’

কাক বলল, ‘লেগে যা—নারদ-নারদ!’

অমনি ঝটাপট, খটাপট, দমাদম, ধপাধপ! মুহূর্তের মধ্যে চেয়ে দেখি উধো চিৎপাত শুয়ে হাঁপাচ্ছে, আর বুধো ছটফট করে টাকে হাত বুলোচ্ছে।

বুধো কান্না শুরু করল, ‘ওরে ভাই উধো রে, তুই এখন কোথায় গেলি রে?’ উধো কাঁদতে লাগল, ‘ওরে হয় হয়! আমাদের কি হল রে!’ তারপর দুজনে উঠে খুব খানিক গলা জড়িয়ে কেঁদে, আর খুব খানিক কোলাকুলি করে, দিব্যি খোশমেজাজে গাছের ফোকরের মধ্যে ঢুকে পড়ল। তাই দেখে কাকটাও তার দোকানপাট বন্ধ করে কোথায় যেন চলে গেল।

আমি ভাবছি এই বেলা পথ খুঁজে বাড়ি ফেরা যাক, এমন সময় শুনি পাশেই একটা ঝোপের মধ্যে কি রকম শব্দ হচ্ছে, যেন কেউ হাসতে হাসতে আর কিছুতেই হাসি সামলাতে পারছে না। উঁকি মেরে দেখি, একটা জন্তু-মানুষ না বাঁদর, প্যাঁচা না ভূত, ঠিক বোঝা যাচ্ছে না—খালি হাত-পা ছুঁড়ে হাসছে, আর বলছে, ‘এই গেল গেল—নাড়ি-ভুঁড়ি সব ফেটে গেল!’

হঠাৎ আমায় দেখে সে একটু দম পেয়ে উঠে বলল, ‘ভাগ্যিস তুমি এসে পড়লে, তা না হলে আর একটু হলেই হাসতে হাসতে পেট ফেটে যাচ্ছিল।’

জন্তুটা বলল, ‘কেন হাসছি শুনবে? মনে কর, পৃথিবীটা যদি চ্যাপ্টা হত, আর সব জল গড়িয়ে ডাঙায় এসে পড়ত, আর ডাঙার মাটি সব ঘুলিয়ে প্যাচপ্যাচে কাদা হয়ে যেত, আর লোকগুলো সব তার মধ্যে ধপাধপ আছাড় খেয়ে পড়ত, তা হলে—হোঃ হোঃ হোঃ’—এই বলে সে আবার হাসতে হাসতে লুটিয়ে পড়ল।

আমি বললাম, ‘কি আশ্চর্য! এর জন্য তুমি এত ভয়ানক করে হাসছ?’

সে আবার হাসি থামিয়ে বলল, ‘না, না, শুধু এর জন্য নয়। মনে কর, একজন লোক আসছে, তার এক হাতে কুলপি বরফ, আর হাতে সাজিমাটি, আর লোকটা কুলপি খেতে গিয়ে ভুলে সাজিমাটি খেয়ে ফেলেছে—হোঃ হোঃ হোঃ, হাঃ হাঃ হাঃ হাঃ হাঃ’—আবার হাসির পালা।

আমি বললাম, ‘কেন তুমি এই সব অসম্ভব কথা ভেবে খামখা হেসে হেসে কষ্ট পাচ্ছ?’ সে বলল, ‘না, না, সব কি আর অসম্ভব? মনে কর, একজন লোক টিকটিকি পোষে, রোজ তাদের নাইয়ে খাইয়ে শুকোতে দেয়, একদিন একটা রামছাগল এসে সব টিকটিকি খেয়ে ফেলেছে—হোঃ হোঃ হোঃ হো—’

জন্তুটার রকম-সকম দেখে আমার ভারি আত্মত লাগল। আমি জিজ্ঞাসা করলাম, ‘তুমি কে? তোমার নাম কি?’ সে খানিকক্ষণ ভেবে বলল, ‘আমার নাম হিজিবিজ্‌বিজ্‌। আমার নাম হিজিবিজ্‌বিজ্‌, আমার ভায়ের নাম হিজিবিজ্‌বিজ্‌, আমার বাবার নাম হিজিবিজ্‌বিজ্‌, আমার পিশের নাম হিজিবিজ্‌বিজ্‌’—আমি বললাম, ‘তার চেয়ে সোজা বললেই হয় তোমার গুপ্তিশুদ্ধ সবাই হিজিবিজ্‌বিজ্‌।’

সে আবার খানিক ভেবে বলল, ‘তা তো নয়, আমার মামার নাম তকাই। আমার মামার নাম তকাই, আমার খুড়োর নাম তকাই, আমার মেশোর নাম তকাই, আমার শ্বশুরের নাম তকাই—’

আমি ধমক দিয়ে বললাম, ‘সত্যি বলছ? না, বানিয়ে?’ জন্তুটা কেমন থতমত খেয়ে বলল, ‘না না, আমার শ্বশুরের নাম বিস্কুট।’ আমার ভয়ানক রাগ হল, তেড়ে বললাম, ‘একটা কথাও বিশ্বাস করি না।’

অমনি কথা নেই বার্তা নেই, ঝোপের আড়াল থেকে মস্ত একটা দাড়িওয়ালা ছাগল হঠাৎ উঁকি মেরে জিজ্ঞাসা করল, ‘আমার কথা হচ্ছে বুঝি?’

আমি বলতে যাচ্ছিলাম ‘না’ কিন্তু কিছু না বলতেই সে তড়তড় করে বলে যেতে লাগল, ‘তা তোমরা যতই তর্ক কর, এমন অনেক জিনিস আছে যা ছাগলে খায় না। তাই আমি একটা বক্তৃতা দিতে চাই, তার বিষয় হচ্ছে— ছাগলে কি না খায়।’ এই বলে সে হঠাৎ এগিয়ে এসে বক্তৃতা আরম্ভ করল—

‘হে বালকবৃন্দ এবং স্নেহের হিজিবিজ্‌বিজ্‌, আমার গলায় ঝুলানো সার্টিফিকেট দেখেই তোমরা বুঝতে পারছ যে আমার নাম শ্রীব্যাকরণ শিং, বি. এ. খাদ্যবিশারদ। আমি খুব চমৎকার ব্যা করতে পারি, তাই আমার নাম ব্যাকরণ, আর শিং তো দেখতেই পাচ্ছ। ইংরিজিতে লিখবার সময় লিখি B.A. অর্থাৎ ব্যা। কোন্-কোন্ জিনিস খাওয়া যায় আর কোন্টা-কোন্টা খাওয়া যায় না, তা আমি সব নিজে পরীক্ষা করে দেখেছি, তাই আমার উপাধি হচ্ছে খাদ্যবিশারদ। তোমরা যে বল-পাগলে কি না বলে, ছাগলে কি না খায়—এটা অত্যন্ত অন্যায়। এই তো একটু আগে ঐ হতভাগাটা বলছিল যে রামছাগল টিকটিকি খায়। এটা এক্কেবারে সম্পূর্ণ মিথ্যা কথা। আমি অনেক রকম টিকটিকি চেটে দেখেছি, ওতে খাবার মতো কিছু নেই। অবশ্যি আমরা মাঝে মাঝে এমন অনেক জিনিস খাই, যা তোমরা খাও না, যেমন—খাবারের ঠোঙা, কিম্বা নারকেলের ছোবড়া, কিম্বা খবরের কাগজ, কিম্বা সন্দেশের মতো ভালো ভালো মাসিক পত্রিকা। কিন্তু তা বলে মজবুত বাঁধানো কোনো বই আমরা কক্ষনো খাই না। আমরা কৃচিং কখনো লেপ কস্বল কিম্বা তোশক বালিশ এসব একটু আধটু খাই বটে, কিন্তু যারা বলে আমরা খাট পালং কিম্বা টেবিল চেয়ার খাই, তারা ভয়ানক মিথ্যাবাদী। কিম্বা চেখে দেখি,—যেমন, পেনসিল রবার কিম্বা বোতলের ছিপি কিম্বা শুকনো জুতো কিম্বা ক্যামবিসের ব্যাগ। শুনেছি আমার ঠাকুরদাদা একবার স্ফূর্তির চোটে

এক সাহেবের আধখানা তাঁবু প্রায় খেয়ে শেষ করেছিলেন। কিন্তু তা বলে ছুরি কাঁচি কিম্বা শিশি বোতল, এ সব আমরা কোনোদিন খাই না। কেউ কেউ সাবান খেতে ভালোবাসে, কিন্তু সে সব নেহাৎ ছোটখাট বাজে সাবান। আমার ছোটভাই একবার একটা আস্ত বার্-সোপ খেয়ে ফেলেছিল’—বলেই ব্যাকরণ শিখ আকাশের দিকে চোখ তুলে ব্যা ব্যা করে ভয়ানক কাঁদতে লাগল। তাতে বুঝতে পারলাম যে সাবান খেয়ে ভাইটির অকালমৃত্যু হয়েছে।

হিজিবিজ্‌বিজ্‌টা এতক্ষণ পড়ে পড়ে ঘুমোচ্ছিল, হঠাৎ ছাগলটার বিকট কান্না শুনে সে হাঁউ-মাঁউ করে ধড়মড়িয়ে উঠে বিষম-টিষম খেয়ে একেবারে অস্থির! আমি ভাবলাম বোকাটা মরে বুঝি এবার! কিন্তু একটু পরেই দেখি, সে আবার তেমনি হাত-পা ছুঁড়ে ফ্যাক্ ফ্যাক্ করে হাসতে লেগেছে।

আমি বললাম, ‘এর মধ্যে আবার হাসবার কি হল?’ সে বলল, ‘সেই একজন লোক ছিল, সে মাঝে মাঝে এমন ভয়ঙ্কর নাক ডাকাত, যে, সবাই তার উপর চটা ছিল। একদিন তাদের বাড়ি বাজ পড়েছে, আর অমনি সবাই দৌড়ে তাকে দমাদম্ মারতে লেগেছে—হোঃ হোঃ হোঃ হোঃ’—

আমি বললাম, ‘যত সব বাজে কথা।’ এই বলে যেই ফিরতে গেছি, অমনি চেয়ে দেখি একটা নেড়ামাথা কে যেন যাত্রার জুড়ির মতো চাপকান আর পায়জামা পরে হাসি হাসি মুখ করে আমার দিকে তাকিয়ে আছে। দেখে আমার গা জ্বলে গেল। আমায় ফিরতে দেখেই সে আব্দার করে আহুদীর মতো ঘাড় বাঁকিয়ে দুহাত নেড়ে বলতে লাগল, ‘না ভাই, না ভাই, এখন আমায় গাইতে বল না। সত্যি বলছি, আজকে আমার গলা তেমন খুলবে না।’ আমি বললাম, ‘কি আপদ! কে তোমায় গাইতে বলছে?’

লোকটা এমন বেহায়া, সে তবুও আমার কানের কাছে ঘ্যানঘ্যান করতে লাগল, ‘রাগ করলে? হ্যাঁ ভাই, রাগ করলে? আচ্ছা, না হয় কয়েকটা গান শুনিয়ে দিচ্ছি, রাগ করবার দরকার কি ভাই?’

আমি কিছু বলবার আগেই ছাগলটা আর হিজিবিজ্‌বিজ্‌টা এক সঙ্গে চেষ্টা করে উঠল, ‘হ্যাঁ-হ্যাঁ-হ্যাঁ, গান হোক, গান হোক।’ অমনি নেড়াটা তার পকেট থেকে মস্ত দুই তাড়া গানের কাগজ বার করে, সেগুলো চোখের কাছে নিয়ে গুন্‌গুন্ করতে করতে হঠাৎ সরু গলায় চীৎকার করে গান ধরল—‘লাল গানে নীল সুর, হাসি-হাসি গন্ধ।’ ঐ একটিমাত্র পদ সে একবার গাইল, দুবার গাইল, পাঁচবার, দশবার গাইল।

আমি বললাম, ‘এতো ভারি উৎপাত দেখছি, গানের কি আর কোনো পদ নেই?’

নেড়া বলল, ‘হ্যাঁ, আছে, কিন্তু সেটা অন্য একটা গান। সেটা হচ্ছে—অলিগলি চলি রাম, ফুটপাথে ধুমধাম, কালি দিয়ে চুনকাম। সে গান আজকাল আমি গাই না। আরেকটা গান আছে—নাইনিতালের নতুন আলু—সেটা খুব নরম সুরে গাইতে হয়। সেটাও আজকাল গাইতে পারি না। আজকাল যেটা গাই, সেটা হচ্ছে শিখিপাখার গান।’ এই বলে সে গান ধরল—

মিশিমাখা শিখিপাখা আকাশের কানে কানে
শিশিবোতল ছিপিঢাকা সরু সরু গানে গানে

আলোভোলা বাঁকা আলো আধো আধো কতদূরে
সরু মোটা শাদা কালো ছলছল ছায়াসুরে।

আমি বললাম, ‘এ আবার গান হল নাকি? এর তো মাথামুণ্ডু কোনো মানেই হয় না।’

হিজিবিজ্‌বিজ্‌ বলল, ‘হ্যাঁ, গানটা ভারি শক্ত।’

ছাগল বলল, ‘শক্ত আবার কোথায়? ঐ শিশি বোতলের জায়গাটা একটু শক্ত ঠেকল, তাছাড়া তো শক্ত কিছু পেলাম না।’

নেড়াটা খুব অভিমান করে বলল, ‘তা, তোমরা সহজ গান শুনতে চাও তো সে কথা বললেই হয়। অত কথা শোনার দরকার কি? আমি কি আর সহজ গান গাইতে পারি না?’ এই বলে সে গান ধরল—

বাদুড় বলে, ওরে ও ভাই সজারু,
আজকে রাতে দেখবে একটা মজারু।

আমি বললাম, ‘মজারু বলে কোনো কথা হয় না।’ নেড়া বলল, ‘কেন হবে না—আলবৎ হয়। সজারু কান্দারু দেবদারু সব হতে পারে, মজারু কেন হবে না?’

ছাগল বলল, ‘ততক্ষণ গানটা চলুক না, হয় কি না—হয় পরে দেখা যাবে।’ অমনি আবার গান শুরু হল—

বাদুড় বলে, ওরে ও ভাই সজারু,
আজকে রাতে দেখবে একটা মজারু।
আজকে হেথায় চাম্‌চিকে আর পৈঁচারু
আসবে সবাই, মরবে হুঁদুর বেচারু।
কাঁপবে ভয়ে ব্যাঙগুলো আর ব্যাঙাচি,
ঘামতে ঘামতে ফুটবে তাদের ঘামাচি,
ছুটেবে ছুঁচো লাগবে দাঁতে কপাচি,
দেখবে তখন ছিম্বি ছ্যাঙা চপাচি।

আমি আবার আপত্তি করতে যাচ্ছিলাম, কিন্তু সামলে গেলাম। গাল চলতে লাগল—

সজারু কয়, ঝোপের মাঝে এখনি
গিন্‌নী আমার ঘুম দিয়েছেন দেখনি?
জেনে রাখুন প্যাঁচা এবং প্যাঁচানী,
ভাঙলে সে ঘুম শুনে তাদের চ্যাঁচানি,
খ্যাংরা-খোঁচা করব তাদের খুঁচিয়ে—

এই কথাটা বলবে তুমি বুঝিয়ে।
বাদুড় বলে, পৈঁচার কুটুম কুটুমী
মানবে না কেউ তোমার এসব ঘুঁতুমি।
ঘুমোয় কি কেউ এমন ভূসো আঁধারে?
গিন্গী তোমার হোঁৎলা এবং হাঁদাড়ে।
তুমিও দাদা হচ্ছ ক্রমে খ্যাপাটে
চিমনি-চাটা ভোঁপসা-মুখো ভ্যাঁপাটে।

গানটা আরও চলত কিনা জানি না, কিন্তু এই পর্যন্ত হতেই একটা গোলমাল শোনা গেল। তাকিয়ে দেখি, আমার আশেপাশে চারদিকে ভিড় জমে গিয়েছে। একটা সজারু এগিয়ে বসে ফোঁৎফোঁৎ করে কাঁদছে আর একটা শামলাপরা কুমির মস্ত একটা বই দিয়ে আস্তে আস্তে তার পিঠ থাবড়াচ্ছে আর ফিস্ফিস্ করে বলছে, ‘কেঁদো না, কেঁদো না, সব ঠিক করে দিচ্ছি।’ হঠাৎ একটা তকমা-আঁটা পাগড়ি-বাঁধা কোলা ব্যাং রুল উঁচিয়ে চীৎকার করে বলে উঠল—‘মানহানির মোকদ্দমা।’

অমনি কোথেকে একটা কালো বোল্লা-পরা ছতোম প্যাঁচা এসে সকলের সামনে একটা উঁচু পাথরের উপর বসেই চোখ বুজে ঢুলতে লাগল, আর একটা মস্ত ছুঁচো একটা বিশী নোংরা হাতপাখা দিয়ে তাকে বাতাস করতে লাগল।

প্যাঁচা একবার ঘোলা ঘোলা চোখ করে চারদিক তাকিয়েই তক্ষনি আবার চোখ বুজে বলল, ‘নালিশ বাতলাও।’

বলতেই কুমিরটা অনেক কষ্টে কাঁদো কাঁদো মুখ করে চোখের মধ্যে নখ দিয়ে খিম্চিয়ে পাঁচ ছয় ফোঁটা জল বার করে ফেলল। তারপর সর্দিবসা মোটা গলায় বলতে লাগল, ‘ধর্মান্বিতার হুজুর! এটা মানহানির মোকদ্দমা। সুতরাং প্রথমেই বুঝতে হবে মান কাকে বলে। মান মানে কচু। কচু অতি উপাদেয় জিনিস। কচু অনেক প্রকার, যথা—মানকচু, ওলকচু, কান্দাকচু, পানিকচু, শঙ্খকচু ইত্যাদি। কচুগাছের মূলকে কচু বলে সুতরাং বিষয়টার একেবারে মূল পর্যন্ত যাওয়া দরকার।’

এইটুকু বলতেই একটা শেয়াল শামলা মাথায় তড়াক করে লাফিয়ে উঠে বলল, ‘হুজুর, কচু অতি অসার জিনিস। কচু খেলে গলা কুট্‌কুট্‌ করে, কচুপোড়া খাও বললে মানুষে চটে যায়। কচু খায় তারা? কচু খায় গুওর আর সজারু। ওয়াক্‌ থুঃ।’ সজারুটা আবার ফ্যাঁৎফ্যাঁৎ করে কাঁদতে যাচ্ছিল, কিন্তু কুমির সেই প্রকাণ্ড বই দিয়ে তার মাথায় এক থাবড়া মেরে জিজ্ঞাসা করল, ‘দলিলপত্র সাক্ষী-সাবুদ কিছু আছে?’ সজারু ন্যাড়ার দিকে তাকিয়ে বলল, ‘ঐ তো ওর হাতে সব দলিল রয়েছে।’ বলতেই কুমিরটা ন্যাড়ার কাছ থেকে একতাড়া গানের কাগজ কেড়ে নিয়ে হঠাৎ এক জায়গা থেকে পড়তে লাগল—

একের পিঠে দুই
চৌকি চেপে শুই
পৌঁটলা বেঁধে খুই
গোলাপ চাঁপা জুঁই
ইলিশ মাগুর রুই
হিন্চে পালং পুঁই
সান্ বাঁধানো ভুঁই
গোবর জলে ধুই
কাঁদিস কেন তুই?

সজারু বলল, ‘আহা ওটা কেন? ওটা তো নয়।’ কুমির বলল, ‘তাই নাকি? আচ্ছা, দাঁড়াও।’ এই বলে সে আবার একখানা কাগজ নিয়ে পড়তে লাগল—

চাঁদনি রাতের পেত্নীপিসি সজনেতলায় খোঁজনা রে—

থ্যাংলা মাথা হ্যাংলা সেথা হাড় কচাকচ্ ভোজ মারে।

চালতা গাছে আলতা পরা নাক বোলানো শাঁখচুনি

মাকড়ি নেড়ে হাঁকড়ে বলে, আমায় তো কেঁউ ডাঁকছনি!

মুগু বোলা উলটোবুড়ি বুলেছে দেখ চুল খুলে,

বলছে দুলে, মিন্‌সেগুলোর মাংস খাব তুলতুলে।

সজারু বলল, ‘দূর ছাই! কি যে পড়ছে তার নেই ঠিক।’

কুমির বলল, ‘তাহলে কোন্টা, এইটা!—দই দম্বল, টোকো অম্বল, কাঁথা কম্বল করে সম্বল বোকা ভোম্বল—এটাও নয়? আচ্ছা তাহলে দাঁড়াও দেখছি—নিঝুম নিশুত রাতে, একা শুয়ে তেতালাতে, খালিখালি খিদে পায় কেন রে?—কি বললে? ওসব নয়? তোমার গিন্‌র নামে কবিতা?—তা, সে কথা আগে বললেই হত। এই তো—রামভজনের গিন্‌টা, বাপ্রে যেন সিংহীটা! বাসন নাড়ে বনারবন, কাপড় কাচে দমাদম্।—এটাও মিলছে না? তা হলে নিশ্চয়ই এটা—

খুস্‌খুসে কাশি ঘুস্‌ঘুসে জ্বর, ফুস্‌ফুসে ছাঁদা বুড়ো তুই মর।

মাজরাতে ব্যথা পাঁজরাতে বাত, আজ রাতে বুড়ো হবি কুপোকাৎ!

সজারুটা ভয়ানক কাঁদতে লাগল, ‘হায়, হায়! আমার পয়সাগুলো সব জলে গেল! কোথাকার এক আহাম্মক উকিল, দলিল দিলে খুঁজে পায় না!’

ন্যাড়াটা এতক্ষণ আড়ষ্ট হয়ে ছিল, সে হঠাৎ বলে উঠল, ‘কোনটা শুনতে চাও? সেই যে—বাদুড় বলে ওরে ও ভাই সজারু—সেইটে?’ সজারু ব্যস্ত হয়ে বলল, ‘হ্যাঁ হ্যাঁ, সেইটে, সেইটে।’

অমনি শেয়াল আবার তেড়ে উঠল, ‘বাদুড় কি বলে? হুজুর, তাহলে বাদুড়গোপালকে সাক্ষী মানতে আজ্ঞা হোক।’

কোলা ব্যাং গাল গলা ফুলিয়ে হেঁকে বলল, ‘বাদুড়গোপাল হাজির?’

সবাই এদিকে ওদিকে তাকিয়ে দেখল, কোথাও বাদুড় নেই। তখন শেয়াল বলল, ‘তাহলে হুজুর, ওদের সঙ্কলের ফাঁসির হুকুম হোক।’ কুমির বলল, ‘তা কেন? এখন আমরা আপিল করব?’

প্যাঁচা চোখ বুজে বলল, ‘আপিল চলুক। সাক্ষী আনো।’

কুমির এদিক ওদিক তাকিয়ে হিজিবিজ্‌বিজ্‌কে জিজ্ঞাসা করল, ‘সাক্ষী দিবি? চার আনা পয়সা পাবি।’ পয়সার নামে হিজিবিজ্‌বিজ্‌ তড়াক করে সাক্ষী দিতে উঠেই ফ্যাক্ ফ্যাক্ করে হেসে ফেলল।

শেয়াল বলল, ‘হাসছ কেন?’ হিজিবিজ্‌বিজ্‌ বলল, ‘একজনকে শিখিয়ে দিয়েছিল, তুই সাক্ষী দিবি যে, বইটার সবুজ রঙের মলাট, কানের কাছে নীল চামড়া আর মাথার উপর লালকালির ছাপ। উকিল যেই তাকে জিজ্ঞাসা করেছে, তুমি আসামীকে চেন? অমনি সে বলে উঠেছে, আঙে হ্যাঁ, সবুজ রঙের মলাট, কানের কাছে নীল চামড়া, মাথার উপর লাল কালির ছাপ—হোঃ হোঃ হোঃ হো—’

শেয়াল জিজ্ঞাসা করল, ‘তুমি সজারুকে চেন?’ হিজিবিজ্‌বিজ্‌ বলল, ‘হ্যাঁ, সজারু চিনি, কুমির চিনি, সব চিনি। সজারু গর্তে থাকে, তার গায়ে লম্বা লম্বা কাঁটা, আর কুমিরের গায়ে চাকা চাকা টিপির মতো, তারা ছাগল-টাগল ধরে খায়।’ বলতেই ব্যাকরণ শিং ব্যা ব্যা করে ভয়ানক কেঁপে উঠল।

আমি বললাম, ‘আবার কি হল?’ ছাগল বলল, ‘আমার সেজোমামার আধখানা কুমিরে খেয়েছিল, তাই বাকি আধখানা মরে গেল।’ আমি বললাম, ‘গেল তো গেল, আপদ গেল। তুমি এখন চুপ কর।’

শেয়াল জিজ্ঞাসা করল, ‘তুমি মোকদ্দমার বিষয়ে কিছু জান?’ হিজিবিজ্‌বিজ্‌ বলল, ‘তা আর জানি নে? একজন নালিশ করে, তার একজন উকিল থাকে, আর একজনকে আসাম থেকে নিয়ে আসে, তাকে বলে আসামী, তারও একজন উকিল থাকে। এক-একদিকে দশজন করে সাক্ষী থাকে। আর একজন জজ থাকে, সে বসে বসে ঘুমোয়।’

প্যাঁচা বলল, ‘কক্ষনো আমি ঘুমোচ্ছি না, আমার চোখে ব্যারাম আছে তাই চোখ বুজে আছি।’

হিজিবিজ্‌বিজ্‌ বলল, ‘আরও অনেক জজ দেখেছি, তাদের সঙ্কলেরই চোখে ব্যারাম।’ বলেই সে ফ্যাক্ ফ্যাক্ করে ভয়ানক হাসতে লাগল।

শেয়াল বলল, ‘আবার কি হল?’ হিজিবিজ্‌বিজ্‌ বলল, ‘একজনের মাথার ব্যারাম ছিল, সে সব জিনিসের নামকরণ করত। তার জুতোর নাম ছিল অবিম্‌ষ্যকারিতা, তার ছাতার নাম ছিল প্রত্যাৎপন্নমতিত্ব, তার গাডুর নাম ছিল পরমকল্যাণবরেষু—কিন্তু যেই তার বাড়ির নাম দিয়েছে কিংকর্তব্যবিমূঢ় অমনি ভূমিকম্প হয়ে বাড়িটাড়ি সব পড়ে গিয়েছে। হোঃ হোঃ হোঃ হো—’

শেয়াল বলল, ‘বটে? তোমার নাম কি শুনি?’ সে বলল, ‘এখন আমার নাম হিজিবিজ্‌বিজ্‌।’

শেয়াল বলল, ‘নামের আবার এখন-তখন কি? হিজিবিজ্‌বিজ্‌ বলল, ‘তাও জানো না? সকালে আমার নাম থাকে আলু-নারকেল আবার আর একটু বিকেল হলেই আমার নাম হয়ে যাবে রামতাদু।’

শেয়াল বলল, ‘নিবাস কোথায়?’ হিজিবিজ্‌বিজ্‌ বলল, ‘কার কথা বলছ? শ্রীনিবাস? শ্রীনিবাস দেশে চলে গিয়েছে।’ অমনি ভিড়ের মধ্যে থেকে উদো আর বুধো একসঙ্গে চোঁচিয়ে উঠল, ‘তাহলে শ্রীনিবাস নিশ্চয়ই মরে গিয়েছে।’ উদো বলল, ‘দেশে গেলেই লোকেরা সব হুস্ হুস্ করে মরে যায়।’ বুধো বলল, ‘হাবুলের কাকা যেই দেশে গেল অমনি শুনি সে মরে গিয়েছে।’

শেয়াল বলল, ‘আঃ, সবাই মিলে কথা বোলো না, ভারি গোলমাল হয়।’ শুনে উদো বুধোকে বলল, ‘ফের সবাই মিলে কথা বলবি তো তোকে মারতে মারতে সাবাড় করে ফেলবা।’ বুধো বলল, ‘আবার যদি গোলমাল করিস তাহলে তোকে ধরে এক্কেবারে পোঁটলা-পেটা করে দেব।’

শেয়াল বলল, ‘হুজুর, এরা সব পাগল আর আহাম্মক, এদের সাক্ষীর কোনো মূল্য নেই।’ শুনে কুমির রেগে ল্যাজ আছড়িয়ে বলল, ‘কে বলল মূল্য নেই? দস্তুরমতো চার আনা পয়সা খরচ করে সাক্ষী দেওয়ানো হচ্ছে।’ বলেই সে তক্ষুনি ঠক্‌ঠক্‌ করে ষোলটা পয়সা গুণে হিজিবিজ্‌বিজ্‌জের হাতে দিয়ে দিল। অমনি কে যেন উপর থেকে বলে উঠল ‘১নং সাক্ষী, নগদ হিসাব, মূল্য চার আনা।’ চেয়ে দেখলাম কাক্কেশ্বর বসে বসে হিসাব লিখছে।

শেয়াল আবার জিজ্ঞাসা করল, ‘তুমি এ বিষয়ে আর কিছু জানো না?’ হিজিবিজ্‌বিজ্‌ খানিক ভেবে বলল, ‘শেয়ালের বিষয়ে একটা গান আছে, সেইটা জানি।’

শেয়াল বলল, ‘কি গান শুনি?’ হিজিবিজ্‌বিজ্‌ সুর করে বলতে লাগল, ‘আয়, আয়, আয়, শেয়ালে বেগুন খায়, তারা তেল আর নুন কোথায় পায়’—বলতেই শেয়াল ভয়ানক ব্যস্ত হয়ে উঠল, ‘থাক্ থাক্, সে অন্য শেয়ালের কথা, তোমার সাক্ষী দেওয়া শেষ হয়ে গিয়েছে।’

এদিকে হয়েছে কি, সাক্ষীরা পয়সা পাচ্ছে দেখে সাক্ষী দেবার জন্য ভয়ানক হুড়োহুড়ি লেগে গিয়েছে। সবাই মিলে ঠেলাঠেলি করছে, এমন সময় হঠাৎ দেখি কাক্কেশ্বর রুপ্ করে গাছ থেকে নেমে এসে সাক্ষীর জায়গায় বসে সাক্ষী দিতে আরম্ভ করেছে। কেউ কিছু জিজ্ঞাসা করবার আগেই সে বলতে আরম্ভ করল, ‘শ্রীশ্রীভূশাঙ্কিগায় নমঃ। শ্রীকাক্কেশ্বর কুচুকুচে, ৪১নং গেছোবাজার, কাগেয়াপটি। আমরা হিসাবী ও বেহিসাবী খুচরা পাইকারী সকল প্রকার গণনার কার্য—’

শেয়াল বলল, ‘বাজে কথা বল না, যা জিজ্ঞাসা করছি তার জবাব দাও। কি নাম তোমার?’

কাক বলল, ‘কি আপদ! তাই তো বলছিলাম—শ্রীকাকেশ্বর কুচুকুচে।’ শেয়াল বলল, ‘নিবাস কোথায়?’ কাক বলল, ‘বললাম তো কাগেয়াপটি।’

শেয়াল বলল, ‘সে এখান থেকে কতদূর?’ কাক বলল, ‘তা বলা ভারি শক্ত। ঘণ্টা হিসাবে চার আনা, মাইল হিসাবে দশ পয়সা, নগদ দিলে দু পয়সা কম। যোগ করলে দশ আনা, বিয়োগ করলে তিন আনা, ভাগ করলে সাত পয়সা, গুণ করলে একশ টাকা।’

শেয়াল বলল, ‘আর বিদ্যে জাহির করতে হবে না। জিজ্ঞাসা করি, তোমার বাড়ি যাবার পথটা চেন তো?’ কাক বলল, ‘তা আর চিনিনে? এইতো সামনেই সোজা পথ দেখা যাচ্ছে।’ শেয়াল বলল, ‘এ-পথ কতদূর গিয়েছে?’ কাক বলল, ‘পথ আবার যাবে কোথায়? যেখানকার পথ সেখানেই আছে। পথ কি আবার এদিক ওদিক চরে বেড়ায়? না, দার্জিলিঙে হাওয়া খেতে যায়?’

শেয়াল বলল, ‘তুমি তো ভারি বেয়াদব হে! বলি, সাক্ষী দিতে যে এসেছ, মোকদ্দমার কথা কি জান?’

কাক বলল, ‘খুব যা হোক! এতক্ষণ বসে বসে হিসাব করল কে? যা কিছু জানতে চাও আমার কাছে পাবে। এই তো, প্রথমেই, মান কাকে বলে? মান মানে কচুরি। কচুরি চার প্রকার—হিঙে কচুরি, খাস্তা কচুরি, নিমকি কচুরি আর জিবেগজা! খেলে কি হয়? খেলে শেয়ালদের গলা কুটকুট করে, কিন্তু কাগেদের করে না। তারপর একজন সাক্ষী ছিল, নগদ মূল্য চার আনা, সে আসামে থাকত, তার কানের চামড়া নীল হয়ে গেল—তাকে বলে কালাজ্বর। তারপর একজন লোক ছিল, সে সকলের নামকরণ করত—শেয়ালকে বলতো তেলচোরা, কুমিরকে বলতো অষ্টাবক্র, প্যাঁচাকে বলতো বিভীষণ—’

বলতেই বিচার সভায় একটা ভয়ানক গোলমাল বেধে গেল। কুমির হঠাৎ খেপে টপ করে কোলা ব্যাংকে খেয়ে ফেলল, তাই দেখে ছুঁচোটা কিচকিকিকিকি করে ভয়ানক চ্যাঁচাতে লাগল, শেয়াল একটা ছাতা দিয়ে হুস্ হুস্ করে কাকেশ্বরকে তাড়াতে লাগল।

প্যাঁচা গস্তীর হয়ে বলল, ‘সবাই এখন চুপ কর, আমি মোকদ্দমার রায় দেব।’ এই বলেই সে একটা কানে-কলম-দেওয়া খরগোশকে হুকুম করল, ‘যা বলছি লিখে নাও, মানহানির মোকদ্দমা, ২৪ নম্বর। ফরিয়াদী—সজারু। আসামী—দাঁড়াও। আসামী কৈ?’ তখন সবাই বলল, ‘ঐ যা! আসামী তো কেউ নেই।’ তাড়াতাড়ি ভুলিয়ে-ভালিয়ে ন্যাড়াকে আসামী দাঁড় করানো হল। ন্যাড়াটা বোকা, সে ভাবল আসামীরাও বুঝি পয়সা পাবে, তাই সে কোনো আপত্তি করল না।

হুকুম হল—ন্যাড়ার তিনমাস জেল আর সাতদিনের ফাঁসি। আমি সবে ভাবছি এরকম অন্যায় বিচারের বিরুদ্ধে আপত্তি করা উচিত, এমন সময় ছাগলটা হঠাৎ ‘ব্যা-করণ শিং’ বলে পিছন থেকে তেড়ে এসে আমায় এক টু মারল, তারপরেই আমার কান কামড়ে দিল। অমনি চারদিকে কি রকম সব ঘুলিয়ে যেতে লাগল, ছাগলটার

মুখটা ক্রমে বদলিয়ে শেষটায় ঠিক মেজোমামার মতো হয়ে গেল। তখন ঠাওর করে দেখলাম, মেজোমামা আমার কান ধরে বলছেন, ‘ব্যাকরণ শিখবার নাম করে বুঝি পড়ে পড়ে ঘুমানো হচ্ছে?’

আমি তো অবাক! প্রথমে ভাবলাম বুঝি এতক্ষণ স্বপ্ন দেখছিলাম। কিন্তু, তোমরা বললে বিশ্বাস করবে না, আমার রুমালটা খুঁজতে গিয়ে দেখি কোথাও রুমাল নেই, আর একটা বেড়াল বেড়ার উপর বসে বসে গৌঁফে তা দিচ্ছিল, হঠাৎ আমায় দেখতে পেয়েই খচ্‌মচ্‌ করে নেমে পালিয়ে গেল। আর ঠিক সেই সময়ে বাগানের পিছন থেকে একটা ছাগল ব্যা করে ডেকে উঠল।

আমি বড়মামার কাছে এসব কথা বলেছিলাম, কিন্তু বড়মামা বললেন, ‘যা, যা, কতগুলো বাজে স্বপ্ন দেখে তাই নিয়ে গল্প করতে এসেছে।’ মানুষের বয়স হলে এমন হেঁৎকা হয়ে যায়, কিছুতেই কোনো কথা বিশ্বাস করতে চায় না। তোমাদের কিনা এখনও বেশি বয়স হয়নি, তাই তোমাদের কাছে ভরসা করে এসব কথা বললাম।

BANGLADARSHAN.COM

॥সমাপ্ত॥